

Pemimpin komponen PH belum tetap tarikh bincang pilih calon

BERITA HARIAN 13 APR 2024

mk.3

Anwar belum kenal pasti wakil parti bertanding PRK pada 11 Mei

Oleh Zanariah Abd Mutalib
zanariah_mutalib@bh.com.my

Hulu Selangor: Pakatan Harapan (PH) belum menetapkan tarikh untuk berbincang mengenai calon mewakili gabungan itu bagi menghadapi Pilihan Raya Kecil (PRK) Dewan Undangan Negeri (DUN) Kuala Kubu Baharu.

Perdana Menteri yang juga Pengerusi PH, Datuk Seri Anwar Ibrahim, berkata pemimpin komponen PH belum mengadakan perbincangan berhubung PRK itu yang dijadualkan pada 11 Mei ini.

Beliau yang juga Presiden Parti Keadilan Rakyat (PKR) berkata demikian ketika ditanya sama ada PH sudah mengenal pasti calon bagi PRK Kuala Kubu Baharu.

“Saya datang ke sini untuk solat (Jumaat) dan hari raya.

“Saya belum berbincang dengan sesiapa mengenainya,” katanya ketika menjawab pertanyaan media pada majlis Jamuan

Hari Raya dan Solat Jumaat di Masjid Bandar Utama Batang Kali, di sini semalam.

Ketibaan Perdana Menteri di masjid itu pada jam 12.24 tengah hari disambut bekas Menteri Besar Selangor, Tan Sri Muhammad Muhammad Taib; Pengerusi Jawatankuasa Tetap Perumahan dan Kebudayaan Negeri Selangor, Borhan Aman Shah serta Ketua Polis Selangor, Datuk Hussien Omar Khan.

Anwar bersama hampir 500 jemaah yang hadir lain turut mendengar khutbah bertajuk “Bagaimana Kita Menyambut Syawal?” bersempena dengan Aidilfitri, sebelum menunaikan solat Jumaat.

Luang masa bersama rakyat

Terdahulu, Perdana Menteri turut menikmati jamuan makan tengah hari bersama rakyat setempat dan meluangkan masa beramah mesra dengan pengurusan masjid serta jemaah pada jamuan hari raya yang diadakan di pekarangan masjid itu.

PRK DUN Kuala Kubu Baharu diadakan susulan kematian penyandangannya, Lee Kee Hiong daripada DAP pada 21 Mac lalu.

Pada Pilihan Raya Negeri yang lalu, Kee Hiong sebagai wakil PH, mēnewaskan calon Perikatan Nasional (PN), Henry Teoh Kien Hong (PN daripada GERAKAN) dengan



Anwar menyantuni orang ramai sebaik tiba bagi menghadiri Jamuan Hari Raya dan Solat Jumaat di Masjid Bandar Utama Batang Kali, semalam.

(Foto Saifullizan Tamadi/BH)

dengan majoriti 4,119 undi.

Turut bertanding calon Parti Ikatan Demokratik Malaysia (MUDA), Dr Siva Prakash mendapat 1,186 undi dan Chng Boon Lai dari Parti Rakyat Malaysia (PRM) mendapat 527 undi.

Kee Hiong, 58, menjadi Ahli Dewan Undangan Negeri (ADUN) Kuala Kubu Baharu di

bawah Parlimen Hulu Selangor sejak 2013, meninggal dunia akibat kanser.

Pada 4 April lalu, Pengerusi Suruhanjaya Pilihan Raya (SPR), Tan Sri Abdul Ghani Salleh, berkata hari pengundian awal bagi PRK DUN Kuala Kubu Baharu pada 7 Mei ini dengan tempoh berkempen selama 14 hari.

Pengundi DUN Kuala Kubu Baharu membabitkan 46 peratus Melayu, Cina (30 peratus), India (18 peratus) dan lain-lain (lima peratus) dengan 40,226 pemilih berdaftar termasuk 39,362 pengundi biasa, 625 anggota polis, 238 anggota tentera dan pasangan serta seorang pengundi di luar negara.